

Namminersorlutik Oqartussat nalunaarutaata iluarsaanneqarnissaa pillugu illersuinnermut timmiarniarnermullu appanik taateraannillu piniarsinnaanerup nalaani peqassuseq aalaakkaasumik nalilerneqarsimappat zoneni aalajangersimasuni ulluni 30-ni sivitsorneqarnissaa pillugu Naalakkersuisut kingusinnerpaamik UKA2026 sumiiffikkaartumik attuumassuteqartunut tusarniaaqqullugit Inatsisartut aalajangiiffisassaattut siunnersuut.

(Inatsisartunut ilaasortaq Jens NapâtôK', Naleraq)

Akissuteqaat

(Aalisarnermut, Piniarnermut, Nunalerinnermut Imminullu Pilersornermut Naalakkersuisoq)

Siullermeerneqarnera

Naalakkersuisut siunnersuuteqartoq Jens NapâtôK', Naleraq, siunnersuutitut saqqummiussaanut qujaffigivaat. Siunnersuuteqartumit siunnersuutigineqarpoq, illersuinnermut timmiarniarnermullu appanik taateraannillu piniarsinnaanerup nalaani peqassuseq aalaakkaasumik nalilerneqarsimappat zoneni aalajangersimasuni ulluni 30-ni sivitsorneqarnissaa pillugu Naalakkersuisut sumiiffikkaartumik attuumassuteqartunut tusarniaaqqullugit Inatsisartut aalajangiissasut.

Appat taateraallu nunatsinni nerisassani nerisarilluarneqarnerpaanut ilaapput, Naalakkersuisullu pingartitaraat isumalluutit uumassusillit siunertamut naapertuuttumik illersorneqarsinnaasumillu atorneqartarnissaasa qulakkeerneqarnissaat.

Taateraatt piniagaaffii atuuttut zone-nut immikkoortitaapput: zone 1 Qaanaaq eqqaanilu aamma zone 2-mi Upernaviup Uummannallu eqqaani septembarip 1-ianiit oktoberip 31-anut, taava upernaakkut martsip 1-ianiit martsip 31-anut. Zone 3 Qeqertallip kommuneaniit Kommune Kujalleq ilanngullugu, 4 Ittoqqortoormiit aamma 5 Tasiilaq eqqaanilu septembarip 1-ianiit martsip 31-ata tungaanut piniagaapput. Tamanna uumassusilerisut siunnersuinerannut naapertuuppoq.

Appat zone 1-mi oktoberip 15-ianiit 28./29. februarimut piniagaaffeqarput. Zone 2-mi septembarip 15-ianiit novembarip 15-ianut. Zone 3-mi novembarip 1-ianiit decembarip 15-ianut. Zone 4 aamma 5 tassa Tunumi novembarip 1-ianiit decembarip 31-at ilanngullugu piniagaapput.

Appanniartarneq kingullermik allanngortinneqarpoq 2017-imi nalunaarummik allannguinnikkut, kingullertigullu nalunaarummi atuuttumi 2023-meersumi allannguut atuutsiinnarneqarluni. Sumiiffiit Qaanaap aqutsiveqarfia ilanngunnagu ukiakkut qaammatini marlunni appanniarsinnaaneq nalunaarummi periarfissiivoq, upernaakkullu Upernaviup aqutsiveqarfiani appanniartarneq periarfissaalluni. Taateraannut tunngatillugu kingullermik allannguisoqarpoq 2016-imi. Appanniarnermi piniarfissatut piffissanut atuuttunut Pinngortitaleriffimmi uumassusilerituut siunnersuutaat malinneqanngilaq. Pinngortitaleriffimmit siunnersuinnermi¹ kajumissaarutigineqarpoq ukiukkut appanniartarneq sivikillineqassasoq qaammat ataasinngortillugu (15. okt. – 15. nov. imaluunniit 15. nov. – 15. dec.), aammalu upernaakkut appanniarnissamut immikkut akuersissuteqarnerit Qaanaap

¹ <https://natur.gl/siunnersuineq-2/timmissat/appat/?lang=kl>

aqutsiveqarfianut akuerineqartassasut (Upernaviup, Ittoqqortoormiit allaniluunniit immikkut akuersisoqartassanngitsaq). Kiisalu Pinngortitaleriffik kajumissaarivoq ingammik upernaakkut piaqqiorfiullu nalaani unioqqutitsilluni appanniartarnerup unitsinneqarnissaanut suli iliuuseqartoqarnissaanik.

Qaanaap eqqaani appaqarfiit kisiartaallutik ajunngitsumik inissisimapput. Nunatsinni sumiiffinni allani appaqarfiit mikippat qajannarlutillu, appaqarfiillu amerlanersaat 1990-ikkunnut sanilliullugit milleriarnikorujussuupput. Piffissaq appanniarfiusartoq sivitsorneqarsinnaassappat appaqassuseq amerliartorfiusumik ingerlassaaq, atuiffigisinnaassagaanni. Appaqarfiit ataasiakkaat alliartortariaqassapput. Uumassusilerituut kingullermik siunnersuutaanni takuneqarsinnaavoq, Qaanaap eqqaani appanik atuineq taamaallaat attanneqarsinnaasoq. Zone-mi tassani piffissaq piniariarfiusartoq marlunnut avitaavoq, tassa ukiakkut upernaakkullu piniarneqartarput zoneniillu allanit sivilisunerusumik piniarneqarsinnaallutik.

Timmissat taakku marluk pineqartunut tunngatillugu, Nunatsinni timmissat pisarineqartartut ilaat nunani allani Atlantikup avannaani piaqqiortuupput. Taamaattumik peqassutsinik nalilersuinermit tamanna eqqarsaatigineqassaaq.

Pisuussutiniq uumassusilinnik atuinermit paasissutissat pigineqartut sapinngisamik nutaajunerpaat aallaavigineqarnissaat Naalakkersuisunit pingartinneqarmat, Naalakkersuisut aalajangiiffigisassatut siunnersuutip ilaatigut naaperiaaffiulluni allannguutissatut siunnersuut una saqqummiunniarpaat:

“Peqassuseq aalaakkaasumik nalilernerqarsimappat appat taateraallu piniagaaffii zone-ni aalajangersimasuni ulluni 30-ni sivitsorneqarsinnaanera pillugu Naalakkersuisut kingusinnerpaamik UKA2026 sumiiffikkaartumik attuumassuteqartunut tusarniaaqqullugit Inatsisartut aalajangiiffigisassatut siunnersuut.”

Taamatut oqaaseqarlunga oqallinnissaq Inatsisartunut ingerlateqqippara.